



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁRIU

Sumáriu:

ORSAMENTU JERÁL ESTADU (OJE) 2021 BA SETÓR JUSTISA JSMP husu atu aloka tuir nesesidade no prioridade

JSMP konsidera importante tebes Orsamentu Jerál Estadu (OJE) ba iha setór Justisa, tanba ne'e husu ba Parlamentu Nasionál bainhira diskute OJE 2021 ba setór justisa nian, bele haree didi'ak alokasaun orsamentu sira atu tuir duni nesesidade no prioridade kada instituisaun ida-idak ni'an.

Tuir Diretora Ezekutiva JSMP, Ana Paula Marçal katak importante mak Orsamentu Jerál Estadu 2021 ba setór justisa tenke tuir nesesidade ka prioridade nune'e bele hatan dezafiu sira ne'ebé durante ne'e setór justisa hasoru.

Alokasaun orsamentu ne'ebé suficiente no tuir nesesidade, sei ajuda rezolve problema ka dezafiu sira ne'ebé durante ne'e instituisaun judisiáriu sira enfrenta hanesan menus facilidade, falta transporte iha defensoria públiku, infraestrutura ne'ebé la adekua, falta ekipamentu, inklui menus rekursu umanus.

Aleinde ne'e, liga ho serbisu defensoria públiku nian, JSMP husu atu finansiamente Defensória Públiku tenke independensia ka la depende ona ba Ministériu justisa nune'e sira bele jere rasik sira nia rekursu tuir sira nia nesesidade ne'ebé iha.

Diretora Ezekutiva JSMP ne'e realsa katak pontu importante seluk ne'ebé presiza konsidera mak formasaun kontinuasaun ba autór judisiáriu sira. Presiza reforsa Sentru Formasaun Jurídika no Judisiária hodi kontinua prepara no kapasita rekursu sira.

Iha OJE 2020 nian, Governu aloka ona tokon US\$13 ba konstrusaun edifisiu tribunál sira-nian. JSMP husu atu iha OJE 2021 nian, bele inklui mós orsamentu ba konstrusaun facilidade no sosa ekipamentu relevante sira hodi proteje sasin tantu imajen no mós lian inklui fatin ba sasin sira ni'an iha tribunál. Nune'e mós orsamentu ba despeza ba sasin sira nian hanesan deslokasaun, alojamentu no hahan nian tuir provizaun sira ne'ebé ona iha Lei Protesaun ba Testemuña.

Bazeia ba hanoin hirak ne'e, JSMP husu atu konsidera asuntu prioridade sira hanesan tuir mai iha OJE 2021:

Rua Beco Lakateu, Aldeia Manu fuik, Suku Kolmera, Administrativu Vera Cruz
Munisípiu Dili, Timor-Leste
P.O Box : 275 . Tlp 3323883

Website: www.jsmp.tl no facebook: www.facebook.com/jsmp.timorleste

- Fasilidade no ekipamentu hodi apoiu serbisu setór judisiáriu liu-liu ba iha defensoria públiku inklui finansiamente Defensória Públiku tenke independensia ka la depende ona ba Ministériu justisa nune'e sira bele jere rasik sira nia rekursu tuir sira nia nesesidade ne'ebé iha.
- Kontinua loke Sentru Formasaun Jurídiku no Judisiaria;
- Aloka orsamentu hodi kontinua hala'ó tribunál móvel, hanesan meu ida hakbesik justisa ba iha povu;
- Formasaun ba iha juis, prokuradór, defensór públiku no advogadu privadu sira inklui mós ofisiál justisa no tradutór sira;

Antes ne'e, iha tinan 2019, JSMP apresenta paraser kona-ba Orsamentu Jerál Estadu (OJE) 2020 ho deskobrimentu sira no problema ne'ebé instituisaun sira enfrenta, hanesan Tribunál Distritál Dili, Baukau, Suai no Oekusi, Ministériu Públiku no Defensoria Públiku. Bazeia ba deskobrimentu ne'e, Prezidente Tribunál Rekursu konsege rezolve ona dezafiu balun. Detallu husi paraser ne'e bele asesu ba JSMP nia website: www.jsmp.tl iha publikasaun submisaun tinan 2019 ka bele asesu iha link ne'e https://jsmp.tl/wp-content/uploads/Paraser-kona-ba-OJE-2020-ba-set%C3%B3r-justisa_TETUM-1.pdf

Iha 12 Dezembru 2019, Prezidente Komisaun A ho ninia membru sira halo mós fiskalizasaun hodi halo vizita direktamente ba iha Tribunál Distritál Suai, Prokuradór Distritál Suai no Prizaun Suai hodi haree direita infrastrutura, fasilidade no rekursu bazeia ba JSMP nia deskobrimentu. Fiskalizasaun ne'e envolve mós JSMP bainhira halo audénsia ho Juis Administradór Tribunál Distritál Suai, Xefe Prokuradór Distritál Suai no Diretór Prizaun Suai.

Nune'e JSMP nafatin husu ba Tribunál Rekursu no Ministériu Justisa atu bele konsidera JSMP nia rekomendasaun sira ne'e inklui deskobrimentu sira ne'ebé antes ne'e JSMP apresenta ona liuhusi paraser ba situasaun balun ne'ebé mak to'o agora seidak rezolve, atu bele tau iha konsiderasaun iha OJE 2021.

Atu hetan informasaun liutan bele kontaktu:

Ana Paula Marçal
 Diretora Ezekutiva JSMP
 Telefone: 3323883
 Email: ana@jsmp.tl
 Website: <https://jsmp.tl/>